

Hak Orang Asli dijaga

JAKOA mohon gazet 98.8 hektar tanah di Serendah, Batang Kali

Oleh Ilah Hafiz Aziz
illahhafiz.abdulaziz@bh.com.my

Kuala Lumpur: Jabatan Perdana Menteri memberi jaminan hak Orang Asli Songkok di Serendah dan Batang Kali, Hulu Selangor akan diperjuangkan.

Menterinya, Waytha Moorthy, berkata Jabatan Kemajuan Orang Asli (JAKOA) sudah membuat permohonan untuk menggazetkan tanah seluas 98.8 hektar tanah di dua kawasan berkenaan sejak September 2017, tetapi ia belum diluluskan kerajaan negeri.

“Ia masih dalam proses runtingan kerana terdapat pertindihan kawasan yang menjadi hak milik Perbadanan Kemajuan Pertanian Selangor (PKPS).

“Satu mesyuarat membabitkan pengarah JAKOA pusat, negeri dan daerah diadakan PKPS dan Pejabat Perhutanan Kuala

Selangor untuk mencari penyelesaian yang menguntungkan semua pihak,” katanya dalam satu kenyataan, semalam.

Waytha juga berharap PKPS menggunakan budi bicara bagi membenarkan buluh dan hasil hutan dikumpul dikeluarkan berikutan ia mata pencarian utama masyarakat Orang Asli di situ.

“Saya berharap, semua pihak tidak mengeluarkan kenyataan yang kurang tepat kerana boleh memberi gambaran salah terhadap ketelusan kerajaan dalam menangani isu itu.

“Kerajaan hari ini sentiasa mengambil kira permasalahan setiap rakyat Malaysia dan bagi perkara sebegini, pihak berwajib akan mengambil kira pandangan dan input akar umbi sebelum membuat keputusan terbaik tanpa tergesa-gesa,” katanya.